



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**21. Kalenderwoche – ab 24. Mai 2009**

## Offriss weschn Abriss

Ja, sogahr im Wesdfersähn, in dor ARD... odor wars ZDF? Jedenfalls hammse ibor Gemnidz berischded, weil mir in Gemnidz alde Heisor abreißen dädn! An dor Leibzischer Schdraße un annerschwo. Die aldn Budn! Genau.

Un dann hammse gesachd, dass sisch de Schdadt fiehrn Abriss Fördormiddl holn dud un dann nochma, wenn die Leide in de Bladde umziehn dun. Odor so ähnlich.

Was da nu dran schlimm is, kannsch iborhaubd nisch vorschdehn! Es dud doch heidzudaache jedor nemm, wassor irschendwo krischn kann! Wenn de Gesetze so sinn...?

Ja, un dann hamm die nu so berischded, als wie wenn das alles schdarg vorwährflisch sein däde! Die Ansachorin is rischdisch emböhrd gewähsn! Die hamm so berischded, als dädn mir in Gemnidz werdvollsdas Gulduhrgud vornischdn. Dengmalgeschidzde Bauwärgel!

Nee, ährlich - wo isch das gesähn un geheerd hab, da habsch widdorma gemährgd, dass mor dähm Fernsähn nischd gloom darf - die dun alles dährardisch offbauschn un vorschlimmorisiern...!

Was mir mid die aldn Budn machn sölldn in Gemnidz... in die kee Schwein neinziehn will, weilse an de Haubdschdraßn lieschn un middlorweile sowieso dodahl vorgammeld sinn... weil de Eischndiehmor nischd gemachd hamm... nee. das hammse nisch gesachd ,die Schlaumeior! Die hamm sisch bloß in de Brusd geschmissn, als wie wennse de Räschor dor Endärbdn sinn un hamm gemeggord!

Daderbei hab isch misch sowas von gefreid, dass die aldn Bruchbudn endlich unnor de Abrissbirne gekomm sinn! In solsche Ruiehn dun doch bloß noch Raddn hausn!

Un dann hammse de Leide gefrachd, die aus die aldn Budn ausgezochn sinn, wo se denn hingezochn sinn. Da hamm die gesachd, dass in de Bladde gezochn sinn. Dass abor die Wohnungen in dor Bladde dodahl scheen sinn, weil alles vom Feinsdn renovierd is... un dass die Bladdn ooch meisdens scheen im Grienen schdehn dun... mid ringsrum Barks un Beeme un Wiese... nee, das hamm die nisch berischded. Die hamm so gedahn als wie wenn das eene Schdrafe sein däde, wenn de Leide aus die aldn Bruchbudn in de Bladde umgezochn sinn. De Bladde is fiehr de Wessis irschendwie de Ingarnadsjohn von alles Beese, was de DDR jemals hervorgebrachd had. So hamm die berischded!

Schade, dass dor Garl-Eduard von Schnidzlor nisch mähr lähm dud! Dähr hädde die Sendung in seim "Schwarz Ganahl" nach alle Reschl'n dor Gunds zorrissn un zorfedzd!

Isch hoffe nu bloß, dass die im Radhaus nisch gleich vor Schregg umfalln dun. Heeschdens kenndn se nochma nachdenkn, ob die Schallschudzwände werglich sein missn. Die häßlischn Dingor dun mir schon an dor Audobahn gahr nisch gefalln. Du fährt da immor zwischndrinne dursch wie eingemauord! Beeme duns villeischd ooch? Abor sonsd - weg mid die aldn Budn!

**Eduard Sachsenmeyer**